

## **Aningaaserivinni il.il. aqutsisoqarneq ingerlatsisoqarnerlu pillugu nalunaarut<sup>1)</sup>**

Aningaasanik ingerlataqarneq pillugu inatsimmi § 65, imm. 2, § 70, imm. 7, § 71, imm. 2, § 152, imm. 4, aamma § 373, imm. 4, tak. inatsimmik nalunaarut nr. 948, 2. juli 2013-imeersoq, inatsikkut nr. 1613, 26. december 2013-imeersukkit allanngortinneqartoq, inatsit nr. 268, 25. marts 2014-imeersoq kiisalu illuutunik qularnaveeqqusiinikkut taarsigassarsisarneq aamma illuutunik qularnaveeqqusiinikkut taarsigassarsisarnermi obligationit il.il. pillugit inatsimmi § 21 aamma § 39, imm. 3, tak. inatsimmik nalunaarut nr. 1261, 15. november 2010-meersoq naapertorlugit, aalajangersarneqarpoq:

### Kapitali 1

#### *Atuuffia*

**§ 1.** Nalunaarut manna suliffeqarfinnut makkununga atorneqarpoq, tak. taamaattoq imm. 2:

- 1) Aningaaseriviit.
- 2) Illuummik qularnaveeqqusiilluni taarsigassarsisarfiit.
- 3) Danmarks Skibskredit A/S
- 4) Aningaasaateqarfinnut akunnermiliuttartut, tak. taamaattoq § 18.
- 5) Aningaasaliisarnermik ingerlatseqatigiiffiit, taamaattorli aningaasaliisarnermi ingerlatseqatigiiffiit danskit UCITS-inik aqutsinerat, peqatigiiffiit immikkut ittut, hedgeforeningit, inuit ikittuinnaat peqatigiiffii akuerisaasut aamma inuussutissarsiutigalugu peqatigiiffiit ilanngunnagit.
- 6) Aningaasatigut suliffeqarfinni allani aningaasaatileqatigiiffiit suliffissuarmi pissutsit pisariaqartitaannik tulluarsarneqarsimasut.
- 7) Taarsigassarsisitsisarfiit, aningaasaliisarnermik ingerlatseqatigiiffiit aamma aqutsiseqatigiiffiit, aningaasanut tunngasuni Unionip isumaqatigiissuteqarfiginngisaani den Europæiske Unionip avataani nunami akuersissumik nalunaarfigineqarsimanngitsumi aamma aningaasanik ingerlataqarneq pillugu inatsimmi, immikkoortortami pissutsit pissutigalugit allaanerussuteqartut, imaluunniit nunani tamalaani isumaqatigiissutini imaluunniit taakku naapertorlugit aalajangersarneqarsimasut.

*Imm. 2.* Suliffeqarfiit imm. 1-imut ilaasut, kiffartuussinernik erseqqinnerusumik killilersorneqartunik ingerlataqarnissamut taamaallaat akuersissuteqartut, immikkoortumi suliffeqarfiup akuersissuteqarfigisaani nalunaarummi maleruagassat malissavaat.

**§ 2.** § 1, imm. 1-imi ilaasuni siulersuisut kiisalu qullersaqarfik suliffeqarfiup toqqissisimanartumik ingerlannissaanut naammattunik aaqqiissassapput. Siulersuisut kiisalu qullersaqarfik aaqqiinerit suut aalajangersakkat eqqortinnissaannut naammannersut pillugit isummertassapput. Aaqqiinerit suut naammannersut eqqarsaatigalugit apeqqutaassaaq suliffeqarfiup ingerlatseriaasia qanoq ittuunersoq, tassunga ilanngullugit

- 1) suliffeqarfiup angissusaa,
- 2) suliffeqarfiup aaqqissugaanera kiisalu suliffeqarfissuup suliffeqarfiup ilaaffigissaani aaqqissugaaneq,
- 3) suliffeqarfiup ingerlatsiffigisaani niuerfigineqartut nunamilu immikkoortut,
- 4) aningaasatigut kiffartuussinernit suliffeqarfiup neqeroortigisai, aamma
- 5) aningaasatigut tunisassiat suliffeqarfiup niuerutigisai.

*Imm. 2. § 1, imm. 1, nr. 1-6-imi* ilaasuni suliffeqarfinni ingerlatseqatigiiffinnik pigineqartuni siulersuisut qullersaqarfillu suliffeqarfissuup toqqissisimanartumik ingerlanneqarnissaanut naammattumik aaqqiissassapput.

## Kapitali 2

### *Siulersuisut suliassaat akisussaaffilu*

**§ 3.** Suliffeqarfiup pingaarnertigut periusissatigullu aqunneqarnerata isumagineranut atasumik siulersuisut

- 1) suliffeqarfiup niueriaasia pillugu aalajangiissassapput, tassunga ilanngullugit § 2, imm. 1, nr. 1-5-imi taaneqartut pissutsit pillugit anguniakkat,
- 2) niueriaaseq tunngavigalugu suliffeqarfiup politikii pillugit aalajangiisarneq, tak. § 4,
- 3) ingerlaavartumik, taamaattorli ikinnerpaamik ukiumut ataasiarluni, suliffeqarfiup aarlerinartui ataasiakkaat tamarmiusullu nalilersortassallugit, tak. § 5 tassunga ilanngullugu aarlerinartut akuerineqarsinnaanersut pillugu isummertarneq,
- 4) suliffeqarfiup missingersuutai, aningaasaatai, akiliisinnaassusia, iliususai pingaarnertit, immikkut aarlerinartui pingaarnertigullu sillimmasiinnermut pissutsit pillugit naliliillutillu aalajangiissassallutik,
- 5) aarlerinartut aalajangersarneqartut, politikkit aalajangersarneqartut kiisalu qullersaqarfimmut najoqqutassat naapertorlugit qullersaqarfiup suliassaminik toqqissisimanartumik isumaginninersoq nalilersortassallugu,
- 6) siulersuisunut qullersaqarfiup nalunaaruteqartarnerata paasissutissiisarneralu akulikissusissaa annertussusaalu pillugit aalajangiineq, taamaalilluni siulersuisut suliffeqarfik taassumalu aarlerinartui pillugit peqqissaartumik paasisimasaqarlutik, aamma siulersuisut sulinerat allatigut naammannersoq pillugu nalunaarusiortarneq,
- 7) suliffeqarfiup nammineq akissaqassusia pillugu ingerlaavartumik ikinnerpaamillu ukiumut ataasiarluni aalajangiisarneq, tak. aningaasanik ingerlatsineq pillugu inatsimmi §§ 124, imm. 2, 125, imm. 4,
- 8) sulinini aaqqissuullugu taamaalilluni suliffeqarfimmik ingerlatsineq toqqissisimanarluni, tak. ilanngussaq 6, aamma
- 9) suliffeqarfik toqqissisimanartumik tamanut saqqummiussisarnersoq attaveqartarnersorlu nalilersorlugu.

**§ 4.** Suliffeqarfiup politikii, tak. § 3, nr. 2, aarlerinartoqarfiusut pineqartut pillugit suliffeqarfiup pingaarnertigut periusissatigut anguniagaanik imaqaassapput, tassunga ilanngullugit immikkoortuni pineqartuni suliffeqarfiup isumagerusutaanik aarlerinartut suunerinik paasisaqarneq killiliinerlu, aamma periusissatigut anguniakkat qanoq anguneqarnissaanut ilitersuutit.

*Imm. 2.* Politikkinut, naleqquffiini, ilaassapput:

- 1) Akiligassarsisitsinermi politikki, tak. ilanngussaq 1.
- 2) Niuerfimmi aarlerinartut pillugit politikki, tak. ilanngussaq 2.
- 3) Suliaqarnermi aarlerinartut pillugit politikki, tak. ilanngussaq 3.
- 4) aarlerinartut sillimmasiinnikkut matussuserneri pillugit politikki.
- 5) Akiliisinnaassutsimut politikki, tassunga ilanngullugu akiliisinnaanerup naammanginnera amigarneraniluunniit upalungaarsimanissamat pilersaarut, tak. ilanngussaq 4.
- 6) Qarasaasiaqarnikkut isumannaallisaanerni politikki, tak. ilanngussaq 5.
- 7) Aarlerinartoqarfiusut allat, suliffeqarfimmut pingaaruteqartutut siulersuisunit missiliorneqartut.

*Imm. 3.* Suliffeqarfiup akiligassarsinikkut, niuernermi aarlerinartut aamma akiliisinnaassutsikkut politikii, tak. imm. 2, nr. 1, 2 aamma 5, kiisalu naleqquttumik annertussuseqartumik aarlerinartut

allat, aarlerinartunut pineqartunut suliffeqarfiup pingaarnertigut periusissatigut anguniagaasa saniatigut, tak. imm. 1, suliffeqarfiup isumagerusutaanik sillimaniarnermi aarlerinartut pillugit anguniakkat killiliinerillu suunerinik imaqaassaaq, tak. taamaattoq § 25, imm. 4.

*Imm. 4.* Suliffeqarfiup politikii suliffeqarfiup isertitaanut aningaasaatitigullu tunngaviinut naleqqiullugit illersorneqarsinnaassapput.

**§ 5.** § 3, nr. 3-p naammassineqarnerani suliffeqarfiup politikii, tak. § 4, kiisalu qullersaqarfimmut najoqqutassai, tak. §§ 6 aamma 7, suliffeqarfiup niuernikkut ingerlataanut, aaqqissugaaneranut isumalluutaanut kiisalu niuerfimmi pissutsinut, suliffeqarfiup ingerlataqarfigisaanut naleqqiullugit toqqissisimanartuunersut siulersuisut ingerlaavartumik nalilersussavaat.

*Imm. 2.* Imm. 1 malillugu nalilersuineq ukununnga naleqqiullugu ingerlanneqassaaq

- 1) aarlerinartut suut suliffeqarfimmut atuunnersut, tassunga ilanngullugu niuernermik ingerlatsinerup aarlerinartunut aarlerinartullu qaffasissusiinut sunniutai,
- 2) ingerlatat suut aarlerinartunut pineqartunut atanersut,
- 3) aarlerinartut ataasiakkaat annertussusaat,
- 4) aarlerinartut assigiinngitsut qanoq imminnut sunniuteqarnersut, tamanna tulluassappat, aamma
- 5) suliffeqarfiup akiitsoqalernissaanut aarlerinartut ataatsimut isigalugu toqqissisimanarnersut, tak. § 4, imm. 3 aamma § 25, imm. 4.

*Imm. 3.* Imm. 1 malillugu nalilersuineq pisariaqartumik annertussuseqartumik aamma ukununnga isummernermik imaqaassaaq

- 1) suliffeqarfik ingerlatani aarlerinartoqarfiusuni toqqissisimanartumik amerlassuseqartunik sulisoqarnerisigut piginnaasaqarnerisigut,
- 2) suliffeqarfik toqqissisimanartumik qarasaasiaqarnerisigut,
- 3) suliffeqarfik suliffissuaqarfillu tamakkerlugit sukkaasumik kinguneqarluartumillu attaveqartarneq pillugu toqqissisimanartumik suleriaaseqarnerisigut, aamma
- 4) suliffeqarfik ingasattumik akiitsoqalernissamut suunerinik, aqutsinissamut nakkutilliinissamullu toqqissisimanartumik suleriaaseqarnerisigut, tak. § 25, imm. 3 aamma 4.

*Imm. 4.* Aarlerinartunut akisussaasup nalunaarusiaa, tak. ilanngussaq 7, siulersuisut tamarmiusumik nalilersuineri tun-ngavigisaannut ilaatinneqassaaq, tak imm. 1.

**§ 6.** Aarlerinartunik nalilersuineq tunngavigalugu, tak. § 5, aamma § 4-mi politikkit aalajangiiffigineqartut naapertorlugit siulersuisut qullersaqarfimmut allatanik najoqqutassaliussapput.

*Imm. 2.* Imm. 1 malillugu najoqqutassani allassimassaaq qullersaqarfiup inissisimanerminut atasumik sunik iliuseqassanersigut, aamma aalajangiinermik sunik qullersaqarfik aalajangiisinaanersigut kingornatigut siulersuisunut ilisimatitsilluni.

*Imm. 3.* Siulersuisut pingaarnertigut aqutsinermi suliassaanut atasumik, tak. §§ 3-5, qullersaqarfimmut pisinnaatitsisinaanngillat, imaluunniit allatigut suliffeqarfimmut nalinginnaasuunngitsut imaluunniit annertuumik pingaaruteqartut. Ilaatigut pisinnaatitaanerit uku qullersaqarfimmut inissinneqarsinaanngillat:

- 1) Ingerlataqarfiusunik pingaarutilinnik allanut suliassanngortitsineq pillugu aalajangiineq.
- 2) Peqataanernut pisussaaffiliisunut imaluunniit pingaarutilinnut aningaasaliinerit, taamaattorli tak. aktiatigut ingerlatseqatigiiffiit pillugit inatsimmi § 117, imm. 1, naggatit sisamaat taallimmaalu aamma piginneqatigiilluni ingerlatseqatigiiffiit pillugit inatsimmi, aamma aningaasanik ingerlataqarneq pillugu inatsimmi § 78-imi ilaasut peqataanerit pisussaaffiliisut.
- 3) Piginanik nalilinnik akiligassanillu annertuumik ukiumoortumik misissuineq, tak. aktiatigut ingerlatseqatigiiffiit pillugit inatsimmi aamma piginneqatigiilluni ingerlatseqatigiiffiit pillugit inatsimmi (ingerlatseqatigiiffiit pillugit inatsimmi) § 115, nr. 1.

- 4) Qullersaqarfimmik kukkunersiuiinermilu pisortamik atorfinitsitsineq.
- 5) Aarlerinartunik naatsorsuineq pillugu tunngaviit pillugit aalajangiineq, tak. § 7, imm. 1, nr. 2, tassunga ilanngullugu suliffiup iluani periutsinik nr. 6-imut ilaanngitsunik atuineq.
- 6) Suliffeqarfiup akissaqassusianik naatsorsuinnermut suliffiup iluani periutsinik akuersinissaq pillugu qinnuteqaat pillugu aalajangiineq, tassunga ilanngullugit:
  - a) Uuttuutit VaR, tak. akiligassarsisitsisarfinnik aamma aningaasaliisarfinnik nakkutilliinikkut piumasaqaatit pillugit Europa-Parlamentip aamma Rådip peqqussutaa (EU) nr. 575/2013, 26. juni 2013-imeersoq.
  - b) Uuttuutit AMA, tak. akiligassarsisitsisarfinnik aamma aningaasaliisarfinnik nakkutilliinikkut piumasaqaatit pillugit Europa-Parlamentip aamma Rådip peqqussutaa (EU) nr. 575/2013, 26. juni 2013-imeersoq.
  - c) Uuttuutit EPE, tak. akiligassarsisitsisarfinnik aamma aningaasaliisarfinnik nakkutilliinikkut piumasaqaatit pillugit Europa-Parlamentip aamma Rådip peqqussutaa (EU) nr. 575/2013, 26. juni 2013-imeersoq.
  - d) Uuttuutit IRB-mik atuineq, jf. akiligassarsisitsisarfinnik aamma aningaasaliisarfinnik nakkutilliinikkut piumasaqaatit pillugit Europa-Parlamentip aamma Rådip peqqussutaa (EU) nr. 575/2013, 26. juni 2013-imeersoq.
- 7) Suliffeqarfiup nammineq akissaqassutsikkut pisariaqartitsinera pillugu aalajangiineq, tak. aningaasanik ingerlataqarneq pillugu inatsimmi §§ 124, imm. 2 aamma 125, imm. 4.

**§ 7. § 6, imm. 1 aamma 2 malillugit najoqqutassat**

- 1) suliffeqarfik sinnerlugu qullersaqarfiup pisinnaatitaaffigisaani aarlerinartut annertussusii pillugit nakkutigineqarsinnaasunik killiliinernik imaqaassaaq, aamma
- 2) aarlerinartut ataasiakkaat pillugit killiliussat qanoq atornerqarnerisa naatsorsorneqarnissaat pillugit tunngavinnik aalaja-ngiineq, tassunga ilanngullugit aningaasatigut sakkunit aningaasanillu pisunit aarlerinartut, suliffeqarfik sinnerlugu avataaneersunit ingerlatsisunit ingerlanneqartut qanoq aarlerinartut tamarmiut naatsorsoneritut ilaassanersut.

*Imm. 2.* Akiligassarsinermi aarlerinartunut, niuerfimmi aarlerinartunut aamma akiliisinnaassutsikkut aarlerinartunut tunngasuni najoqqutassani killiliinerit, tak. ilanngussaq 1, 2 aamma 4, aarlerinartut ataasiakkaat killilernerata annertussusianik paatsuugassaannngitsumik allassimassapput, imaluunniit suliffeqarfiup aningaasaatitigut tunngaviinut naleqqiullugu aarlerinartuq inissinneqarluni.

*Imm. 3.* Najoqqutassat taamaallaat qaqutigoortumik aarlerinartut aalajangerneqartup aamma najoqqutassatigut killiliussap avataaniittumik annertussuseqartumik aarlerinartuni qullersaqarfiup iliuuseqarnissaanut periarfissiisoqarsinnaavoq aatsaallu taamaallaat tamatumunnga tunngavigisat najoqqutassanit takuneqarsinnaappata. Tunngavigisat taakku aalajangersarneqarsimanngippata najoqqutassani killiliussanik qaangiinissamut siumoortumik pisinnaatitaaffinnik qullersaqarfimmut tunniussisoqarsinnaanngilaq.

*Imm. 4.* Qullersaqarfimmut najoqqutassanik ilusilersuineri siulersuisunut toqqissisimanassaaq pisortaq imaluunniit qullersaqarfimmi ilaasortat tamarmiullutik suliffeqarfimmut toqqissisimanartumik pisinnaatitaaffiit najoqqutassani ilaasut atornerinik pisariaqartunik ilisimasaqarnissaat misilittagaqarnissaallu.

*Imm. 5.* Najoqqutassanit takuneqarsinnaassaaq siulersuisunut nalunaarusiorneq qanoq ingerlanneqassanersoq qanorlu akulikitsigissanersoq. Tassunga ilanngullugu takuneqarsinnaassaaq immikkoortuni siulersuisut qullersaqarfimmut killinik aalajangiiffigisaani imaluunniit inatsisini killinik aalajangersaaffigineqartunik qullersaqarfik qanoq aamma qanoq akulikitsigisumik nalunaarusiortassanersoq. Aammattaaq nalunaarusiornermit takuneqarsinnaassaaq inatsisini aalajangersarneqartut killiliussat eqqortinneqarsimanersut. Aarlerinartunut siulersuisunit

aalajangersarneqartut killiliusat qanoq annertutigisumik maannakkut piffissallu ingerlanerani atorneqarsimanersut takuneqarsinnaassaaq, tassunga ilanngullugu killiliussanik qaangiisoqarsimanersaq. Kiisalu nalunaarusiamut ilaassalluni uuttuutit atorneqartut tatiginartuunerinik siulersuisut naliliinerannut tunngavik, uuttuutininik taamatut ittunik suliffeqarfik atuisimappat.

*Imm. 6.* Imm. 5 malillugu nalunaarusiornermut aamma ilaassapput aningaasat aamma ingerlatsisunut avataaneersunit ingerlanneqartunit aningaasaneersunit aarlerinartut pillugit nalunaarusiorneq, tassa, tak. ingerlataqarfiit pingaarutillit allanut suliassanngortinneri pilugit Kalaallit Nunaanni nalunaarummi § 2, imm. 2, naggat kingulleq, aningaasat ingerlatsisunit avataaneersunit ingerlanneqartut aamma aningaasat allat ataatsimoorlutik siulersuisunit aalajangersarneqartut najoqqutassat iluanni aamma inatsisit naapertorlugit inissinneqarnissaat siulersuisut suli akisussaaffigimassuk.

### Kapitali 3

#### *Qullersaqarfiup suliassai akisussaaffiilu*

§ 8. Qullersaqarfik inatsimmi aalajangersakkat naapertorlugit suliffeqarfimmik ulluinnarni aqutsinermik isumaginnissaaq, tassunga ilanngullugit aktiatigut ingerlatseqatigiiffiit pillugit inatsit, aamma piginneqatigiilluni ingerlatseqatigiiffiit pillugit inatsit aamma aningaasanik ingerlataqarneq pillugu inatsimmut ilaasut peqataanerit pisussaaffiliisut, siulersuisunit akuerineqartut politikkit, tak. § 4, siulersuisunit najoqqutassanngortinneqartut, tak. §§ 6 aamma 7, aamma siulersuisuniit oqaasiinnakkut allakkatigulluunniit aalajangiinerit ilitsersuutillu allat.

*Imm. 2.* Siulersuisunit akuerineqartut politikkit najoqqutassallu suliffeqarfiup ulluinnarni ingerlatsinerani atulersinnissaat qullersaqarfiup qulakkiissavaa.

*Imm. 3.* Siulersuisut qinnutigisimasaanik, kiisalu siulersuisut sulinerannut pingaaruteqarsinnaasutut qullersaqarfimmit nalilerneqartunik paasissutissanik siulersuisunut paasissutissanik ingerlatitseqqinnissamut qullersaqarfik pisussaaffeqarpoq.

*Imm. 4.* Aarlerinartunut akisussaasumik aamma eqqortitsinissamut akisussaasumut, taakku sulinerannut pingaaruteqarsinnaasunik qullersaqarfiup naliliineranik paasissutissanik ingerlatitseqqinnissamut qullersaqarfik pisussaaffeqarpoq.

*Imm. 5.* Qullersaqarfiup aamma sulisut pisariaqartumik annertussuseqartumik aarlerinartuunerinik kingunerlutsitsinnaanerinillu naliliiffigineqarsinnaasunut suliffeqarfiup taamaallaat iliuuseqartarnissaanut ulluinnarni aqutsisutigit qullersaqarfik akisussaavoq.

*Imm. 6.* Suliffeqarfiup suleriaasianik, tak. § 13, imm. 1, qullersaqarfik akuersissaaq, imaluunniit taamaaliornissamut pisariaqartumik suliatigit ilisimasaqartunik inummik imaluunniit aaqqissugaanikkut immikkoortortamik ataatsimik arlalinnilluunniit toqqaasinnaalluni.

*Imm. 7.* Ilungersunartunik ingerlatsinikkut akornusersuinernut, qarasaasiat ajutoornerinut, allatigit ingerlatsinermi akornusersuinernut kiisalu inuit pingaarutillit soraarnerinut atatillugu suliniutit suut pilersinneqarnissaannut ilitsersuisoqarnissaanut qullersaqarfik qulakkeerissaaq.

*Imm. 8.* Suliffeqarfimmut, illuatungerisamut imaluunniit sullitanut annertuumik aarlerinartunik kinguneqarsinnaasunik kiffartuussinernik tunisassianillu nutaanik ineriartortitsinermut akuersinermullu suliffeqarfiup najoqqutassaanik qullersaqarfik akuersissaaq, tassunga ilanngullugit tunisassiaareersuni allannguinerit, taamaalilluni tunisassiap aarlerinartuunera annertuumik allanngorluni.

### Kapitali 4

#### *Aaqqissugaaneq akisussaaffiillu agguarneri*

### *Suliassat isumalluutillu*

§ 9. Suliffeqarfik aaqqissugaanikkut immikkoortuni erseqqissumik nassuiarneqartunik suliassaqtuni aaqqissuunneqassaaq, tassunga ilanngullugit sulisut tamarmik erseqqissunik pisinnaatitaaffeqarneri, akisussaaffeqarneri atassuteqarnerilu. Tassunga atasumik suliassat suut ingerlanneqassanersut aamma suliassat qanoq isumagineqassanersut immikkoortortanut sulisunullu a-taasiakkaanut erseqqissalluni.

*Imm. 2.* Aaqqissugaanikkut immikkoortortat isumalluutitigut piginnaasaqarnikkullu inuttalersugaassapput taamaalilluni immikkoortortanut isumagisassanngortinneqarsimasunik suliassanik toqqissisimanartumik immikkoortortat naammassisaqarsinnaallutik.

### *Siulersuisunik aqutsisunillu allanik il.il. paasissutissiineq*

§ 10. Suliffeqarfik imatut aaqqissugaassaaq taamaalilluni paasissutissat siulersuisunut, qullersaqarfimmut aaqqissugaanerullu sinnerani aqutsisunut kiisalu aarlerinartunut akisussasumut aamma eqqortitsinissamut akisussaasumut apuuttussat paasissutissat eqqortumik taakkulu sulinerannut ilusimikkut matussusiisumik apuussinnaallutik, tassunga ilanngullugit piffissarisap iluani aamma pisariaqanngitsumik kinguarsaasoqarnani aaqqiinerit aallartissinnaanerinek qulakkeerisumik iluseqartillugit.

### *Suliat avissaartinneri*

§ 11. Suliffeqarfik aaqqissugaanermigut imatut aaqqissuunneqarsimassaaq immikkoortuni atorneqartuni sulisut akilersuinermik, angusanik aarlerinartunillu naatsorsuinernik, nakkutilliinermik imaluunniit nalunaarusiornermik ingerlataqartumut immikkoortortamut akisussaaffeqartumut pisortamut atasuunatik.

*Imm. 2.* Suliffeqarfiup aaqqissugaanera ima aaqqissuunneqarsimassaaq nalunaaruteqartarfiit erseqqissumik nassuiarneqarsimallutik.

*Imm. 3.* Suliffeqarfiup akilersuineri, angusanik aarlerinartunillu naatsorsuineri, nakkutilliinera aamma nalunaarusiorneri immikkoortumi tassani isumagineqarsinnaalluni, tamanna toqqissisimanartutut isigineqarsinnaappat, tak. § 2, aamma suliffeqarfiup suliassaasa allat suuneri eqqarsaatigalugit.

*Imm. 4.* Suliffeqarfinni imm. 1-3 naapertorlugu suliat avissaartinneqarsimanngitsut, tak. § 2, suliffeqarfiup pisariaqanngitsumik aarlerinartoqalinnginnissaa imaluunniit annaasaqartinnginnissaa qulakkeerlugu aaqqiinernik taarsiisinnaasunik ikkus-sisoqassaaq.

## Kapitali 5

### *Allaffissornikkut naatsorsuutitigullu suleriaaseq*

#### *Allaffissornikkut suleriaaseq*

§ 12. Suliffeqarfik imatut aaqqissuunneqarsimassaaq immikkoortortat sulisullu ataasiakkaat, suliamik ingerlannissaanut pisariaqartunik suleriaatsinik, najoqutassanik upalungaarsimanerimik pilersaarutinik, aaqqissuussinernik allatigullu sakkunik piareersimasuuteqassallutik, tak. § 13.

§ 13. Suliffeqarfik ingerlataqarfiusuni pingaarutilinni tamani suleriaaseqassaaq. Ingerlatat nammineq aningaasaqarnikkut suliaqarnermini suliffeqarfimmut attuumassuteqartut aallaaviatigut pingaaruteqartutut isigineqarput.

*Imm. 2. Suleriaatsit minnerpaamik*

- 1) pissarsiariuminartuussapput paasiuminartuullutillu,
- 2) naammattumik ingerlatassat ingerlanneqartussat allaaserineqarsimallutik, tassunga ilanngullugit inatsisit allallu malittarisassat naleqquttut kiisalu suliffeqarfiup aqutsisuunit aalajangerneqartut politikkit najoqqutassallu malinneqarneri eqqortinneqarnerilu qulakkeerneqarluni,
- 3) aaqqissugaanikkut immikkoortoq, inuit imaluunniit inuit eqimattat kikkut suliassanik ataasiakkaanik imaluunnit suliassat ilaannik suliaqassanersut allanneqarsimassalluni, aamma
- 4) suliffiup iluani pissutsini allannguineri imaluunniit attuumassuteqartutigut iluarsaanermi ingerlaavartumik nutarterisoqarluni.

*Imm. 3. Suleriaatsit elektronikikkut pissarsiarineqarsinnaassapput. Qullersaqarfiulli suliffeqarfimmi aaqqissuussinerit unittoornerini pissarsiarineqarsinnaaneri qulakkiissavaa.*

**§ 14.** Suliffeqarfiup ingerlatai pillugit pisariaqartumik uppersaateqarnissaq qullersaqarfiup qulakkiissavaa, tak. imm. 2. Uppersaateqarnissaq allaganngorlugu imaluunniit elektroniskiusumik pigineqassaaq.

*Imm. 2. Tassunga ilanngullugit uku pillugit suleriaaseqarnissaq qullersaqarfiup qulakkiissavai*

- 1) aalajangiinerit, pisinnaatitaanerit, suliassat suliarineqartut niuernerillu kiisalu pisut qanoq annertutigisumik uppersarneqassanersut,
- 2) uppersaaneq qanoq iluseqartumik pissanersaq,
- 3) uppersaanerup pissarsiarineqarsinnaanera qanoq qulakkeerneqassanersaq,
- 4) uppersaateqarnissaq qanoq sivisutigisumik toqqorneqarsimassanersaq, aamma
- 5) tamanna tulluassappat, kimut uppersaateqarnissaq qanoq aamma ingerlateqqinneqassanersaq.

#### *Naatsorsuutitigut suleriaaseq*

**§ 15.** Suliffeqarfik pitsaasumik naatsorsuutitigut suleriaaseqassaaq. Tamatuma ilaatigut kinguneraa,

- 1) suliffeqarfiup, tak. § 14, ukiumoortumik aamma ukiup ilaanut nalunaarusiai tamanut saqqummiunneqartut, tassunga ilanngullugit aningaasartuutit nassuiaatillu tamarmik, nalunaarusiamut pineqartumut atuuttut maleruagassat naapertorlugit suliarineqarsimaneri uppersarsinnaagai, aamma
- 2) suliffeqarfik ukiumoortumik aamma ukiup ilaani nalunaarusianik suliaqarnermut atugassanik paasissutissanik pisariaqartunik pissarsiniassasoq, tassunga ilanngullugit naatsorsuutitigut missiliuinerimik tunngaveqartumik naatsorsuutini ilanngussat aalajangersarnissaannut atornerneqartussat paasissutissat attuumassuteqartut.

### Kapitali 6

#### *Aarlerinartunik aqutsineq aamma eqqortitsineq*

##### *Aarlerinartunut akisussaasoq aamma aarlerinartunik aqutsinikkut sulineq*

**§ 16.** Suliffeqarfiup aarlerinartunik aqutsissuteqarnissaa aamma aarlerinartunut akisussaasoqarnera qullersaqarfiup qulakkiissavaa, tak. ilanngussaq 7. Aarlerinartunik aqutsissut pisariaqartumik annertussuseqartumik qullersaqarfik apeqqutaatinnagu siulersuisunut toqqaannartumik saaffiginnissinnaanera nalunaaruteqarsinnaaneralu qullersaqarfiup qulakkiissavaa, aamma aarlerinartunik aqutsissut nangaanartunik oqaaseqarsinnaanera aamma immikkut aarlerinartutigut ineriartorneri suliffeqarfimmut sunniuteqartillugit imaluunniit sunniisinnaatillugit

siulersuisunut kalerriisinnaalluni, tamanna siulersuisuniittumut akisussaannermut attuinngikkaluarluni, tak. aningaasanik ingerlatsineq pillugu inatsimmi § 70, aamma akiligassarsisitsisarfinnik aamma aningaasaliisarfinnik nakkutilliinikkut piumasaqaatit pillugit Europa-Parlamentip aamma Rådip peqqussutaa (EU) nr. 575/2013, 26. juni 2013-imeersoq, inatsisikkut Kalaallit Nunaanni atulersinneqartoq.

*Imm. 2.* Aarlerinartunut akisussaasumik soraarsitsineri pisariaqarpoq siulersuisut siumoortumik akuersinissaat.

*Imm. 3.* Imm. 1 aamma 2-mi aalajangersakkat aningaasatigut suliffeqarfinni allani aningaasaatileqatigiiffinnut atorneqanngillat, tak. § 1, imm. 1, nr. 6, aningaasanik ingerlataqarnerunngitsaq.

### *Eqqortitsineq*

**§ 17.** Suliffeqarfimmut atuuttunik inatsisinik, niuerfimmi malittassanik imaluunniit suliffiup iluani maleruagassanik suliffeqarfiup eqqortitsinnginneranut aarlerinartut paasineqarnissaannut annikillisarmissaannullu tulluurtunik periutsinik suleriaatsinillu suliffeqarfik peqassaaq (eqqortitsinissamut aarlerinartut).

*Imm. 2.* Suliffeqarfik attaviitsumik ingerlasumik eqqortitsinissamut atortoqassaaq, aamma imm. 1 malillugu periutsit suleriaatsinillu aamma aaqqiinerit, amigaataasinnaasunik oqilisaassisinnaasut sunniteqarnerinik nakkutilliisoqarlunilu naliliisoqarluni.

*Imm. 3.* Suliffeqarfinni, pappiaqqanik aningaasanik nalilinnik niuertuni, aamma § 18-imut ilaanngitsunut, pappiaranik aningaasanik nalilinnik niuernermet tunngasoq suliffeqarfiup ilaanut eqqortitsinissamut atortoq, inunnut aningaasaliinikkut kiffartuussisumik aamma aningaasaliineri ingerlaqartunut akisussaasunut eqqortitsinermik aamma siunnersuineri ikiuinermillu suliaqassaaq.

*Imm. 4.* Eqqortitsinermik atortup akisussaaffigisani eqqortumik attaviitsumillu isumagisinnaagai qulakkeerniarlugu qullersaqarfiup qulakkiissavaa piumasaqaatit uku naammassineqarsimassasut:

- 1) Eqqortitsinermut atortoq pisariaqartumik isumalluutinik peqassaaq, pisariaqartunik piginnaasaqassaaq aamma suliatigut paasisimasaqassaaq kiisalu paasisutissanut attuumassuteqartunut tamanut isersinnaassalluni.
- 2) Sulisoq ataaseq, qullersaqarfimmit toqqarneqartoq, eqqortitsinermi atortumut aamma siulersuisunut qullersaqarfimmullu nalunaarusiornissamut akisusaassaaq. Aalajangersakkami uani pineqartumi siulersuisunut qullersaqarfimmullu naleqqiullugu nalunaarusiorneq ikinnerpaamik ukiumut ataasiarluni pisassaaq. Eqqortitsinermut akisussaasoq aamma siulersuisunut toqqaannartumik oqaaseqarnissaminut periarfissaqassaaq, tamatuma pisariaqarnera eqqortitsinermut akisussaasup missiliorpagu.
- 3) Sulisut, eqqortitsinermi atortumi peqataasut, kiffartuussinerit tunniunneqarnerini imaluunniit ingerlatat nakkutigisami ingerlanneqarnerini peqataaqqusaanngillat.
- 4) Eqqortitsinermi atortumi sulisunut akissarsianik aalajangersaanermi periuseq taassuma attaviitsuuneranik uloriarnartorsiortitsissanngilaq.

*Imm. 5.* Imm. 4, nr. 3 aamma 4-mi aalajangersakkat atorneqassanngillat, piumasaqaatit taakku suliffeqarfiup ingerlataasa suunerinut, annertussusaannut katitigaanerinullu naleqqiullugu naammaginaruunnginneri uppernarsarneqarsinnaappat.

*Imm. 6.* Suliffeqarfiup qullersaqarfia naliliippat suliffeqarfiup angissusaa imaluunniit suliffeqarfiup ingerlataasa katitigaaneri pissutissaqartippassuk inuk ataaseq eqqortitsinissamut akisussaasussatut aamma aarlerinartunut akisussaasutut toqqarsinnaavaa. Taamaattorli tamatigut qulakkeerneqassaaq eqqortitsinermi suliaminnut atasumik nakkutigisaminnik suliat ingerlannerini sulisut peqataannnginissaat.



§ 18. §§ 16-17-imi aalajangersakkat aningaasaateqarfinnut akunnermiliuttartut taamaallaat akuersissuteqartunut suliffeqarfinnut atorneqassanngillat.

### *Pisinnaatitaaffinnik ingerlatitseqqinneq*

§ 19. Siulersuisut, qullersaqarfiup allatigullu aqutsisut akornanni pisinnaatitaaffinnik ingerlatitseqqiineq uppersarsarneqarsinnaassaaq, tak. § 14, aamma tamanna pillugu suleriaaseq suleriaatsinit takuneqarsinnaassalluni, tak. § 13.

*Imm. 2.* Pisinnaatitaaffinnik ingerlatitseqqiineq pisinnaatitaaffinnik tiguneqartunik toqqissisimanartumik atornissaannik pisariaqartunik ilisimasaqartunut, paasisimasaqartunut misilittagaqartunullu sulisunut taamaallaat pisinnaavoq.

*Imm. 3.* Pisinnaatitaaffinnik ingerlatitseqqiinnermi minnerpaamik allanneqarsimassaaq

- 1) pisinnaatitaanerup imaluunniit pisinnaatitaanerit ingerlateqqinneqartut suuneri annertussusaalu,
- 2) pisinnaatitaanerup atorneqarnerinik naatsorsuinnermut tunngaviit,
- 3) tunisassiat imaluunniit iliuutsit suut pisinnaatitaanermut ilaanersut,
- 4) § 7, imm. 1-imi piunasaqaatinik naammassinnittut pisinnaatitaanerit taamatut ittut aarlerinartuunerinut killiliussat kiisalu naatsornerinut tunngaviit, aamma
- 5) inuit imaluunniit aaqqissugaanermi immikkoortoq suna pisinnaatitaaffinnik tunniussisumut allanullu qanoq akulikitsigisumik nalunaaruteqartarnissaa.

*Imm. 4.* Pineqartup nammeneq tigusimasaanit pisinnaatitaaffiit sinnerlugit pisinnaatitaaffinnik kinaluunniit ingerlatitseqqiisnaangilaq. Pisinnaatitaaffiit ingerlateqqinneqartut katinneri, tassunga ilanngullugit sulisunut eqimattanut tunniunneqartut pisinnaatitaaffiit, siulersuisut qullersaqarfinnut pisinnaatitaaffinnik imaqartunik najoqqutassat sinnissanngilai.

*Imm. 5.* Pisinnaatitaaffinnik ingerlatitseqqiinnermut atatillugu ilassutaasumik aarlerinartunik anguniakkanik aalajangiisoqarsimappat, pisinnaatitsisup qulakkiissavaa aarlerinartunik ilassutaasunik anguniakkanik atuneq imatut pissanngitsoq pisinnaatitaaffiliinernik allanut sippuisumik pinnginnissaat qulakkeerneqarluni.

### *Nakkutilliinerit*

§ 20. Qullersaqarfiup qulakkiissavaa suliassanik aarlerinartortalinnik pingaaruteqartunik tamanik nakkutilliisoqarnissaa, tassunga ilanngullugit

- 1) qullersaqarfinnut najoqqutassaliani § 7, imm. 1, nr. 1 naapertorlugu siulersuisunit killiliussat aalajangersarneqartut tamarmik aamma inatsimmi killiliussat eqqortinneqarneri,
- 2) pisinnaatitaaffinnik ingerlateqqinneqartunik eqqortitsineq,
- 3) sullitanit imaluunniit illuatungerisanik piginnaatitsissut naapertorlugu suliffeqarfiup iliuuserisai, aamma aarlerinartunik killiliussanik eqqortitsinissamut suliffeqarfiup pisussaaffigisaani, tassunga ilanngullugu inssiinnermi killiliussat,
- 4) iliuusissat, illuatungerisanik isumaqatigiissutigineqartut aarlerinartunut killiliussanik eqqortitsinissamut suliffeqarfiup pisussaaffigai, assersuutigalugu aningaasatigut sakkunik niuerneq pillugu tunngaviumik isumaqatigiissutit, aamma
- 5) suliassat allat, arlaannik peqquteqartumik suliffeqarfinnut aningaasaqarnikkut annertuumik imaluunniit aarlerinartunik pingaarutilinnik allanik kinguneqarsinnaasut, tassunga ilanngullugit pissarsinnermut atatillugu suliffeqarfiup kontoini suliassanilu iliuuserisat imaluunniit naatsorsuutinut tunngavissanik suliaqarneq aamma suliffeqarfiup nammeneq akissaqarnikkut pisariaqartitaanik aalajangersaneq.

*Imm. 2.* Nakkutilliinnerup suliamik suliarinnittumit allaanerusumit immikkoortortamit allamit ingerlanneqassaaq, tak. § 11, imm. 1. § 11, imm. 1-ili nakkutilliinernut naligiissarinerisunut,

suleriaatsit eqqortinneqarnerinik nakkutilliinermut, kukkunernik nassaarniarnermut assigisaanullu atorpeqassanngilaq, tamanna pisumi aalajangersimasumi toqqissisimanartuuppat.

*Imm. 3.* Imm. 1 aamma 2-mut ilaasut nakkutilliinerit naleqquttumik akuttussuseqartumik ingerlanneqassapput, suliffeqarfiup angissusaa, suliffeqarfiup niuerneranut, ingerlataqarfianut, aarlerinartup pineqartup paasiuminaatsuuneranut aamma suliffeqarfiup aningaasaatitigut pissusaanut naleqqiullugu aarlerinartut ataasiakkaat pingaaruteqarneri annertussusaalu apeqqutaatillugit. Nakkutilliinerit, ullup ingerlanerani ingerlaavartumik iliuuseqartoqartillugu ullup iluani killiliussanik eqqortitsinernut tunngasuus-saaq. Ullup iluani nakkutilliinerit, tamanna toqqissisimanartuutillugu, misiligutinik tigusinernik tunngaveqassapput.

*Imm. 4.* Allaffissornikkut suliat toqqissisimanartumik assigiiaartumillu suliarineqarnerinik aamma suleriaatsit il.il. eqqortinneqarnerinik tulluurtumik suliffeqarfik nakkutilliissaaq.

### *Suliffiup iluani nalunaarusiorneq*

**§ 21.** Qullersaqarfiup § 6 malillugu najoqqutassani imaluunniit pisinnaatitaaffinni ingerlateqqinneqartuni imarineqartut aarlerinartunik tigusinermut killiliussanik tamanik eqqortitsineq atuinerlu pillugit aqutsisoqarnikkut attuumassuteqartuni tamani allakkatigut toqqissisimanartumillu ingerlaavartumik nalunaarusiorortoqartarnissaa qulakkiissavaa. Tamanna suliffeqarfimmut pineqartumut naleqquttuni immikkoortuni aarlerinartut pillugit killiliussat inatsisini aalajangersarneqartut eqqortinneqarneri pillugit aamma nalunaarusiorortoqassaaq. Nalunaarusiarineqartunut aamma ilaassapput aarlerinartut ingerlatsisut sinnerlugit suliffeqarfimmit aqunneqartut.

*Imm. 2.* Nalunaarusiorneq paasiuminartumik iluseqassaaq aamma qullersaqarfik sulisullu allat ingerlateqqinneqartunik pisinnaatitaaffeqartut, tak. § 19, piffissap ingerlanerani atuneq pillugu killiliussanik aalajangersarneqartunik maannakkut atuneq pillugu paasissutissiissalluni.

*Imm. 3.* Aarlerinartunik naatsorsuineri suliffiup iluani uuttuutinik suliffeqarfik atuippat nalunaarusiornermut aamma ilaassapput uuttuutip tatiginartuuneranik uppersaanermi misissuinerit attuumassuteqartut.

*Imm. 4.* Pisinnaatitaaffiit ingerlateqqinneqartut pillugit nalunaarusiorneq, tassunga ilanngullugu taakkuninnga qaangiineq, ulluinnarni iliuusissanut tunniussisup peqataaneranut naapertuuttumik akuttoqatigiittumik pisinnaatitaaffinnik tunniussisimasumut pissaaq, aamma pisinnaatitaaffinnit takuneqarsinnaasumut. Qaangiineq ileqqusumik qaangiinerup paasineqarnerata kingorna kingosinnerpaamik ullormi nalunaarutigineqassaaq.

**§ 22.** Najoqqutassani imaluunniit pisinnaatitaaffinni ingerlateqqinneqartuni aalajangersarneqartunut pisinnaatitaaffinnut ilaanngitsut pissutsit pingaarutillit allat pillugit nalunaarusiorortoqarnissaa qullersaqarfiup qulakkiissavaa, tak. imm. 2. assersuutigalugu tassaasinnaavoq naligiissarineri kukkunernut, pissusissaanngitsumik iliornermut, suliatigut pissutsit malitsigisaanik annaasanut, naatsorsuutini imaluunniit missingersuutini kukkunernut, inuit pingaarutillit soraarnerinut il.il. tunngasunik nalunaarusiorneq.

*Imm. 2.* Suliffeqarfiup suleriaasia sapinngisamik pissutsit suut nalunaarusiorfigineqassanersut imaluunniit nalunaarusiorfigineqartariaqarnersut aamma kimut nalunaarusiorortoqassanersooq pillugu ilitsersuutinik imaqqassaaq, tassunga ilanngullugit nalunaarusiorneq immikkut pisuni ulluinnarni pisortamut pineqartumit imaluunniit taassuma pisortaanit allaanerumut pisinnaasoq imaluunniit pissasoq takuneqarsinnaassaaq.

### *Kiffartuussinerit tunisassiallu nutaat*

**§ 23.** Kiffartuussinerit tunisassiallu nutaat ineriartortinneri akuerineqartarnerilu pillugit najoqqutassaliortoqarnissaa qullersaqarfiup qulakkiissava, tassunga ilanngullugit kiffartuussinerni tunisassianilu pioreersuni allanngornerit, taamaalilluni kiffartuussinerit tunisassiallu pissusaat annertuumik allanngortinneqarlutik, tak. § 8, imm. 8. Najoqqutassat minnerpaamik

- 1) tunisassiaq imaluunniit kiffartuussineq qanoq ilinerani nutaajunersaq killiliissaaq, tamanna sapernartinnagu,
- 2) aaqqissugaanikkut immikkoortorta, ataatsimiitsitaliaq imaluunniit suleqatigiissitaliaagallartoq sorleq imaluunniit sorliit inerisaanermik isumaginnissanersaq allanneqarluni, ajornanngippat aarlerinartoqarfiusunut agguarlugit,
- 3) inerisaalluni sulinermi kikkut minnerpaamik peqataatinnissaannut najoqqutassanik imaqarluni, taamaalilluni pissutsit attuumassuteqartut tamarmik erseqqissarneqarlutik,
- 4) pingaarnertigut pissutsit suut misissoqqissaarneqassanersut uppenarsarneqassanersullu pillugu najoqqutassanik imaqarluni, tassunga ilanngullugit suliffeqarfimmut aarlerinartoq sunaanersaq, annertussusaa naatsorsorneqarneralu, suliffeqarfiup aningaasartuutaanut isertitaanullu sunniuteqarneq, suliffeqarfiup niuerfinni nutaani ingerlataqarsinnaaneranut periarfissat, suliffeqarfiup akissaqassusianik naatsorsuutitigullu suliarinninnermut sunniuteqarneq,
- 5) suliffeqarfiup tunisassianik imaluunniit kiffartuussinernik nutaanik toqqissimanartumik passussinissaanut naammattunik immikkut ilisimasaqartoqarnera, aaqqissuussaqarnera, aningaasaateqarnera allatigullu isumalluuteqarnera misissuinermi uppenarsarneqarnissaanik piumasagaatinik imaqassalluni, aamma
- 6) tunisassiat kiffartuussinerillu nutaat suliffeqarfimmut imaluunniit suliffeqarfiup sullitaanut annertuumik nutaanik aarlerinartunik kinguneqartitsisinnaasut siulersuisunut saqqummiunneqartarnissaannut najoqqutassat pillugit aalajangersakkamik imaqassaaq, § 4-mi akuerineqartut politikkit naapertorlugit imaluunniit §§ 6 aamma 7-imi najoqqutassat malillugit tunisassiaq nutaaq atorneqartoq allanngortitsinermik kinguneqartitsissanersaq isummerfigineqarnissaa siunertaralugu, tassunga ilanngullugu tunisassiamut atasut aarlerinartunik naatsorsuineq pillugu immikkut tunngavinnik aalajangersaaneq.

**§ 24.** Aarlerinartunut akisussaasq kiffartuussinernik tunisassianillu nutaanik inerisaanermut akuersinermullu atatillugu peqataassaaq imaluunniit minnerpaamik tusarniarneqartarluni. Akuersiniarnermi suliap ingerlanera pillugu aarlerinartunut akisussaasq ingerlaavartumik ilisimatinneqartassaaq.

*Imm. 2.* Aarlerinartunut akisussaasq tunisassianik pioreersunik allannguineq tunisassianik nutaanik inerisaanermut akuersinermut piumasagaatinut allannguut ilaaneramik kinguneqassanersaq pillugit isummernermut atatillugu tusarniarfigineqassaaq. Tunisassiamik pioreersumik allannguineq tunisassiatut nutaatut suliarineqassasq aarlerinartunut akisussaasup tamatigut piumasarisinnaavaa.

#### *Akiitsoqalersinnaanerup aarlerinarnera*

**§ 25.** Akiitsoqalersinnaanermi nalunaarummi matumani ima paasineqassaaq akiitsoqalersinnaaneq uani nassuiarneqartoq, tak. akiligassarsisitsisarfinnut aningaasaliisarfinnullu nakkutilliinikkut piumasagaatit pillugit Europa-Parlamentip aamma Rådip peqqussutaani (EU) nr. 575/2013-imi 26. juni 2013-imeersumi immikkoortoq 4, imm. 2, nr. 93.

*Imm. 2.* Ingasattumik akiitsoqalersinnaanermi paasineqarpoq ingasattumik akiitsoqalersinnaaneq soorlu uani nassuiarne-qartoq, tak. akiligassarsisitsisarfinnut aningaasaliisarfinnullu nakkutilliinikkut piumasagaatit pillugit Europa-Parlamentip aamma Rådip peqqussutaani (EU) nr. 575/2013-imi 26. juni 2013-imeersumi immikkoortoq 4, imm. 2, nr. 94.

*Imm. 3.* Ingasattumik akiitsoqalersinnaanerup paasineqarnissaa, nakkutigina aqunneqarneralu pillugu najoqqutassaliornissaq qullersaqarfiup qulakkiissavaa. Najoqqutassani minnerpaamik allanneqassapput

- 1) ingasattumik akiitsoqalersinnaanerup paasineqarnissaa, nakkutigina aqunneqarneralu pillugu suleriaatsit,
- 2) ingasattumik akiitsoqalersinnaanermik uuttuinissamut periutsit, tassunga ilanngullugu pigisat nalillit aamma akiligassat akornanni naapertuuttoqannginneranut atatillugu aarlerinartut, aamma
- 3) akiitsoqalernerumut tunuliaqutaasunik annertuunik allanngortoqarneranik naliliinissamut periutsit.

*Imm. 4.* Aningaaserivinnut 65 mia. kr.-nik annikinnerusumik sulinermi aningaasaateqartunut, illuummik qularnaveequsiillu taarsigassarsisarfinnut 5 mia. kr.-inik annikinnerusunik aningaasaatinik tunngaveqartunut, aamma suliffeqarfinnut § 1, imm. 1, nr. 3-5-imut ilaasunut, aamma akiligassarsisitsisarfinnut aningaasaliisarfinnullu nakkutilliinikkut piumasaqaatit pillugit Europa-Parlamentip aamma Rådip peqqussutaani (EU) nr. 575/2013-imi 26. juni 2013-imeersumi, immikkoortoq 429 aamma immikkoortoq 499 imm. 1, litra b malillugu periutsit malillugit naatsorsorneqartumik 15 pct.-imik annertunerusumik akiitsoqalersinnaasunut imm. 3, § 4, imm. 3, § 5, imm. 2, nr. 5 aamma imm. 3, nr. 4 atorineqassanngillat.

## Kapitali 7

### *Pineqaatissinerit*

§ 26. §§ 3-7, § 8, imm. 2-4, aamma 6-9, § 9, § 11, imm. 1, 2, aamma imm. 4, § 12, § 13, imm. 1, oqaaseqatigiit siulliit, imm. 2 aamma 3, § 14, § 15, § 16, imm. 1, § 17, imm. 1-4, aamma imm. 6, oqaaseqatigiit aappaat, § 19, § 20, imm. 1, imm. 2, oqaaseqatigiit siulliit, imm. 3, oqaaseqatigiit siulliit aamma aappaat aamma imm. 4, § 21, § 22, imm. 1, oqaaseqatigiit siulliit aamma imm. 2, § 23, § 24, § 25, imm. 3, aamma § 26, imm. 4-mik unioqutitsinerit akiliisitsinikkut pineqaatissiissutaassapput.

*Imm. 2.* Pinerluttulerinermi inatsimmi kapitali 5-imi maleruagassat malillugu ingerlatseqatigiiffiit il.il. (inatsisitigut pisinnaatitaasut pisussaataasullu) pinerluttoqarneranik akisussaatinneqarsinnaapput.

## Kapitali 8

### *Atulersitsinermi ikaarsaarnermilu aalajangersakkat*

§ 27. Nalunaarut ulloq 31. marts 2014-imi atulersinneqarpoq.

*Imm. 2.* Aningaaserivinni il.il. aqutisoqarneq ingerlatsisoqarnerlu pillugu nalunaarut nr. 1325, 1. december 2010-meersoq atorunnaarsinneqarpoq.

*Finanstilsyni, ulloq 27. marts 2014*

ULRIK NØDGAARD

/ Stig Nielsen